

## HAIKU ŽEMAITĒŠKĀ

Silvējē UDA (Šiaulē)

(Haiku - pruožēnē poezējē, gēmusi Japuo-nijuo XIX omžiou. Haiku klasēkēnē forma: 3 eilotēs, katrūs skēiminīs pasiskērstē 5+7+5. Kūriniūs užfiksoujems muomēnta gruožis, dvasēnē būsenā, spalvas, garsā, vaizdā).

Pavasaris. Bonifaco Vengalio nuotrauka



\*\*\*

Aišķiausē matiau,  
kāp tava giliuos' akies'  
dongos nuskēnda.

\*\*\*

Prapliopa lītos.  
Greitā pēlks šaligatvis  
lietsargēs pražid.

\*\*\*

Dar mēnesēina  
sustingusi tebklausuos  
akmēnū šnekuos.

\*\*\*

Ikaita dēinas.  
Iš nelaisvēs pomporā  
žēidus paleida.

\*\*\*

Vāka pērštelē  
jūras pakruntie palēk  
laikēn ī raša.

\*\*\*

Rītmetē rūkā.  
Šiauliū katedra iškēlst  
dom gulbiu sparnās.

\*\*\*

Žaliuo pakruntie  
dēdlē sraunos bangavēms  
mon rūpesnius praus.

\*\*\*

Nu daržū posēs  
parbaltoun babas  
koudielis.  
Karštīmet' darbā.

\*\*\*

Užgēiduoj gaidē.  
Nauji dēina pradiejē  
roužītēis palēngvā.

\*\*\*

Varpū skumbiejēms  
žmuonēlius suvērpenēs  
buokštē ožsidarē.

\*\*\*

Jūruo saulē tērpst.  
Rausvūs' šešielīūs'  
mauduos  
pēnkēs žuviedras.

\*\*\*

Jaukiūs numeliūs  
unt dēdlē karšta  
pečiaus  
skani kuošē plep.

\*\*\*

Vēskas nutēla.  
Vakars lig avinielis  
pri šuona prigloda.

\*\*\*

Gražē pri opēs.  
Tēn glousnē plaukus  
mazguo ēlgiausius.

\*\*\*

Vākā išvažiav.  
Supīnies' pu kaštuono  
tik vies besisop.

\*\*\*

Didelis ežers  
viel leliju taurelies'  
vakara gurkšnuo.

\*\*\*

Žvalgaus nu kalna.  
Vakarūs ož eglīna  
dongos ožsideg'.

\*\*\*

Naktēis vēdurie  
untis prūda pavēršiuou  
žvaigždelēs lesiuo.

\*\*\*

Do ēlgē ajerā  
kvapū skaniū pritvinkē  
po douna atgol'.



Pavasaris. Bonifaco Vengalio nuotrauka